

LIGJ PËR VETËQEVERISJE LOKALE

1.DISPOZITAT E PËRGJITHSHME

Neni 1

Përmbajtja e ligjit

Me këtë ligj rregullohen: kompetencat e komunës; pjesëmarrja e drejtpërdrejtë e qytetarëve në marrjen e vendimeve; organizimi dhe puna e organeve të komunës; administrata komunale; aktet e organeve; prona e komunës; mbikëqyrja mbi punën e organeve të komunës; shpërndarja e këshillit të komunës; mekanizmat e bashkëpunimit ndërmjet komunave dhe Qeverisë së Republikës së Maqedonisë; vetëqeverisja vendore; mbrojtja e vetëqeverisjes lokale; përcaktimi i gjuhëve zyrtare në komuna dhe çështje tjera me rëndësi për vetëqeverisjen lokale.

Neni 2

Emëruesi

(1) Shprehje të veçanta të përdorura në këtë ligj, kanë këtë domethënie:

1. "Komuna" është njësi e vetëqeverisjes lokale, si bashkësi e banorëve të një territori të caktuar, e përcaktuar me ligj, e cila përmes organeve dhe përmes administratës si dhe veprimtarive të organizuara publike, mundëson kryerjen e kompetencave të përcaktuara me ligj.
2. "Dispozitat" janë akte të përgjithshme me të cilat këshilli e rregullon kryerjen e kompetencave të komunës.
3. "Bashkëpunimi ndërkombëtar i komunave" është çdo veprim i komunave nga Republika e Maqedonisë i ndërmarrë në përputhshmëri me ligjin, për vendosje të bashkëpunimit mes tyre dhe bashkësive lokale ose pushteteve lokale të një ose më shumë shteteve, si dhe anëtarësimi i asociacioneve të tyre në organizata ndërkombëtare të bashkësive lokale ose pushteteve lokale.
4. "Proces i vendosjes" është tërësia e aktiviteteve të këshillit që përbëhet prej: definimit dhe përcaktimit të çështjeve të cilat duhet të zgjidhen, propozimeve dhe vendimeve, shqyrtimit dhe sjelljes së dispozitave dhe masave.
5. "Pjesëmarrja e drejtpërdrejtë e qytetarëve" është përfshirja individuale ose kolektive e banorëve të komunës në marrjen e vendimeve për punë me rëndësi lokale në nivele të ndryshme të vendosjes.
6. "Kompetencat e komunës" është tërësia e punëve me interes publik e me rëndësi lokale që në përputhshmëri me ligjin, Komuna ka të drejtë t'i kryej në territorin e vet dhe mban përgjegjësi për kryerjen e tyre.
7. "Delegimi i ekzekutimit" është bartja e kryerjes së punëve të përcaktuara nga kompetencat të një organi, organit tjetër, gjatë së cilës puna kryhet në emër, sipas udhëzimeve dhe përgjegjësisë së organit i cili e ka bartur kryerjen.
8. "Punë të interesit publik me rëndësi lokale" punohet për interesin e bashkësisë së përgjithshme lokale ose pjesëve të saja të veçanta, të përcaktuara me ligj.

9. "Kontrata për kryerjen e punëve të interesit publik me rëndësi lokale" është kontratë me të cilën komuna e autorizon një person të caktuar juridik ose fizik, që në emër dhe në interes të komunës, të kryej punë me interes publik me rëndësi lokale.

10. "Veprimtaritë publike" janë organizata joprofitabile për kryerje të shërbimeve publike (ndërmarrjet publike dhe entet publike), që kryejnë veprimtari të interesit publik me rëndësi lokale.

11. "Shërbime publike" është kryerja e punëve të interesit publik me rëndësi lokale për shfrytëzuesit.

12. "Shfrytëzues i shërbimit publik" është çdo person fizik dhe juridik që shfrytëzon shërbimet e veprimtarive publike, dhe

13. "Përgjegjësia" është obligimi i komunës, respektivisht i personave të zgjedhur në funksione publike të nivelit lokal, për dëmin e shkaktuar personave të tretë nga veprimet dhe lëshimet gjatë kryerjes së kompetencave të tyre.

Neni 3

Komunat

(1) Njësi të vetëqeverisjes lokale janë komunat.

(2) Komunat janë persona juridik.

(3) Komunat i kryejnë kompetencat e tyre përmes organeve të zgjedhura drejtpërsëdrejti nga qytetarët.

Neni 4

Qyteti i Shkupit

(1) Qyteti i Shkupit është njësi e veçantë e vetëqeverisjes lokale ku realizohen nevojat dhe interesat e përbashkëta të qytetarëve që dalin nga karakteri i qytetit të Shkupit, si kryeqytet i Republikës së Maqedonisë.

(2) Dispozitat e këtij ligji vlejnë edhe për qytetin e Shkupit, si njësi e veçantë e vetëqeverisjes lokale, nëse me ligjin e qytetit të Shkupit nuk është rregulluar ndryshe.

Neni 5

Realizimi i të drejtës për vetëqeverisje lokale

Qytetarët e shfrytëzojnë të drejtën për vetëqeverisje lokale të drejtpërdrejtë dhe nëpërmjet përfaqësuesve në organet e komunës.

Neni 6

Banorët e komunës

Qytetarët e Republikës së Maqedonisë që kanë vendbanim të përhershëm në territorin e komunës janë banorë të komunës.

Neni 7

Dispozitat e komunës

(1) Kryerjen e kompetencave të veta komuna e bënë sipas statutit dhe dispozitave të tjera.

(2) Me statutin e komunës rregullohen: organizimi dhe puna e organeve të komunës; organizimi dhe puna e komisioneve të këshillit; kryerja e punëve nga neni 20 i këtij ligji; mënyra e informimit të qytetarëve; rastet e përjashtimit të publikut nga seancat e këshillit; mënyra dhe procedura e paraqitjes së kërkesave dhe propozimeve për punën e organeve të komunës dhe veprimi me to; mënyra e organizimit të tribunave publike; realizimi i anketave dhe grumbullimi i propozimeve nga qytetarët; mënyra e kryerjes së obligimeve nga lëmia e mbrojtjes në gjendje lufte si dhe çështje të tjera me rëndësi për vetëqeverisjen lokale.

(3) Aktet e komunës shpallen para se të hynë në fuqi.

(4) Mënyra e shpalljes të dispozitave rregullohet me statutin.

Neni 8

Informimi i publikut

(1) Organet e komunës, komisionet e këshillit dhe veprimtaritë publike të themeluara nga komuna, janë të obliguara pa kompensim t'i informojnë qytetarët për punën e tyre, si dhe për planet dhe programet që janë me rëndësi për zhvillimin e komunës, në mënyrë të përcaktuar me statutin.

(2) Komuna është e obliguar qytetarëve t'iu mundësojë qasje në informatat themelore për shërbimet që ua siguron, në mënyrë dhe sipas kushteve të përcaktuara me statutin.

Neni 9

Territori dhe emri i komunës

Komuna ka territorin dhe emrin e vet të përcaktuar me ligj.

Neni 10

Stema dhe flamuri i komunës

(1) Komuna mund të ketë stemën dhe flamurin e vet.

(2) Stema dhe flamuri i komunës (në tekstin e mëtutjeshëm: stema dhe flamuri) dallohet prej stemës dhe flamurit të Republikës së Maqedonisë si dhe prej stemës dhe flamurit të komunave tjera dhe të qytetit të Shkupit.

(3) Stema dhe flamuri dallohen edhe prej stemës dhe flamurit të shteteve të tjera, njërive të vetëqeverisjes lokale të shteteve të tjera dhe të organizatave ndërkombëtare.

(4) Mënyra dhe procedura për përcaktimin e stemës dhe flamurit të komunës rregullohet me statutin.

(5) Ministria kompetente për punët që i përkasin vetëqeverisjes lokale mban regjistër të stemave dhe flamujve të komunave në Republikën e Maqedonisë.

(6) Stema dhe flamuri mund të përdoren pas regjistrimit në regjistrin nga paragrafi (5) i këtij neni.

(7) Ministri kompetent për kryerjen e punëve që i përkasin vetëqeverisjes lokale e përcakton përmbajtjen dhe mënyrën e udhëheqjes së regjistrit nga paragrafi (5) i këtij neni.

Neni 11

Financimi i komunave

(1) Në përputhje me politikën ekonomike të shtetit, komuna financohet nga burime të veta të të ardhurave dhe nga burime të tjera të financimit.

(2) Burime personale të të ardhurave të komunës janë tatimet lokale, kompensimet dhe taksat.

(3) Komuna në suaza të përcaktuara me ligj, e përcakton lartësinë e shkallës së tatimeve dhe lartësinë e kompensimeve dhe taksave nga paragrafi (2) i këtij neni.

(4) Komuna financohet edhe nga dotacionet e shtetit dhe burimeve të tjera të të ardhurave.

(5) Komuna ka të drejtë të hyj në borxh në tregun e brendshëm dhe të jashtëm të kapitalit, në përputhje me ligjin.

(6) Komuna, në suaza të kompetencave të veta, disponon në mënyrë të pavarur me burimet e veta të të ardhurave.

(7) Burimet e të ardhurave të komunës duhet të sigurojnë kryerje përkatëse të kompetencave të saja të përcaktuara me ligj.

(8) Financimi i komunës rregullohet me ligj.

Neni 12

Zhvillimi i viseve jo mjaft të zhvilluara të komunës

Republika siguron mjete për zhvillim të viseve jo mjaft të zhvilluara të komunës, në pajtueshmëri me kriteret dhe në mënyrë të përcaktuar me ligj.

Neni 13

Buxheti i komunës

(1) Komuna ka buxhetin e vet.

(2) Çështjet që kanë të bëjnë me buxhetin e komunës rregullohen me ligj.

Neni 14

Bashkëpunimi ndërkomunal

(1) Në kryerjen e kompetencave të veta komunat mund të bashkëpunojnë ndërmjet veti.

(2) Me qëllim të realizimit të interesave të përbashkëta dhe kryerjen e punëve të përbashkëta në kompetencën e komunave, ato mund të bashkojnë mjete dhe të formojnë veprimtari të përbashkëta publike, në përputhje me ligjin.

(3) Me qëllim të kryerjes së kompetencave të veçuara komunat mundën gjithashtu të formojnë trupa të përbashkëta administrative në lëmenj të caktuara në përputhje me ligjin.

(4) Komunat mund të bashkëpunojnë edhe me njësi të vetëqeverisjes lokale të shteteve të tjera, si dhe me organizata ndërkombëtare të bashkësive lokale, si dhe të anëtarësohen në organizata ndërkombëtare të pushteteve lokale.

(5) Ministria kompetente për kryerjen e punëve që kanë të bëjnë me vetëqeverisjen lokale mban evidencë për bashkëpunimin e realizuar ndërkombëtar të komunave, në përputhje me ligjin.

Neni 15

E drejta e bashkimit të komunave

Me qëllim të mbrojtjes dhe përparimit të interesave të përbashkëta komunat mund të bashkohen në shoqata, në përputhje me këtë dhe tjetër ligj.

II. THEMELIMI DHE TERRITORI I KOMUNAVE

Neni 16

Themelimi

Komuna themelohet për territorin e një ose më shumë vendbanimeve në të cilat qytetarët janë të lidhur me nevoja dhe interesa të përbashkëta në të cilat ekzistojnë kushte për zhvillim material dhe shoqëror dhe për pjesëmarrjen e qytetarëve në marrjen e vendimeve për nevojat dhe interesat lokale.

Neni 17

Territori

Territori në të cilin themelohet komuna duhet të paraqesë një tërësi me lidhshmëri natyrore gjeografike e ekonomike, me komunikacione ndërmjet vendbanimeve dhe gravitim drejt qendrës së përbashkët, si dhe të ketë objekte të ndërtuara të infrastrukturës dhe objekte të standardit shoqëror.

Neni 18

Kufijtë

Gjatë përcaktimit të territorit të komunës mbahet llogari për kufijtë e komunave kadastrale, ashtu që kufijtë e komunës të mos i presin kufijtë e komunave kadastrale.

Neni 19

Ndarja territoriale

(1) Ndarja territoriale e Republikës së Maqedonisë, përcaktimi i territorit, emrat, selitë dhe kufijtë e komunave, procedurat për themelimin e komunave (bashkimi, ndarja dhe ndryshimi i kufijve) dhe çështje të tjera në lidhje me ndarjen territoriale, rregullohen me ligj.

(2) Themelimi i komunave të reja, si dhe ndërrimi i selisë së komunave kryhet me ligj.

III. KOMPETENCAT E KOMUNAVE

Neni 20

Kompetenca e përgjithshme

Komunat, në suaza të ligjit, në përputhje me parimin e subsidiaritetit, kanë të drejtë në territorin e vet t'i kryejnë punët e interesit publik me rëndësi lokale, që nuk janë të përjashtuara nga kompetencat e tyre ose nuk janë në kompetencë të organeve të pushtetit shtetëror.

Neni 21

Kompetencat e komunave

(1) Komunat në mënyrë të pavarur, në suaza të ligjit, i rregullojnë dhe kryejnë punët e interesit publik me rëndësi lokale, të përcaktuara me këtë ose ligj tjetër dhe janë përgjegjëse për kryerjen e tyre.

(2) Me ligjin me të cilin rregullohen kompetencat e tjera të komunave caktohen edhe burimet financiare për kryerjen e atyre kompetencave.

(3) Kompetencat nga paragrafi (1) të këtij neni parimisht janë të plota dhe të pakontestueshme dhe nuk guxojnë të merren ose kufizohen, përveç në raste të përcaktuara me ligj.

Neni 22

Lista e kompetencave

(1) Komunat janë kompetente për kryerjen e punëve vijuese:

1. Planifikimi urbanistik (urban dhe rural), dhënia e lejes për ndërtim të objekteve me rëndësi lokale të përcaktuara me ligj, rregullimi i hapësirës dhe rregullimi i tokës ndërtimore.
2. Mbrojtja e mjedisit jetësor dhe natyrës - masa për mbrojtje dhe pengimin nga ndotja e ujit, ajrit, tokës, mbrojtja e natyrës, mbrojtja nga zhurmimi dhe rrezatimi jonizues.
3. Zhvillimi ekonomik lokal - planifikimi i zhvillimit ekonomik lokal; përcaktimi i përparësive zhvillimore dhe strukturale, udhëheqja me politikën ekonomike; përkrahja e zhvillimit të ndërmarrjeve të vogla dhe të mesme dhe të iniciativave në nivel lokal dhe në atë kontekst pjesëmarrja në vendosjen dhe zhvillimin e rrjetit lokal të institucioneve dhe agjencive dhe promovimi i partneritetit;
4. Veprimtaritë komunale - furnizimi me ujë për pije; përcjellja e ujit teknologjik; përcjellja dhe pastrimi i ujërave të ndotura; ndriçimi publik; dërgimi dhe trajtimi i ujërave atmosferik; mirëmbajtja e higjienës publike; grumbullimi, transportimi dhe procedimi me mbeturinat e ngurta komunale; rregullimi dhe organizimi i trafikut publik lokal të udhëtarëve; furnizimi me gaz natyror dhe energji ngrohëse; mirëmbajtja e varreve, varrezave, krematoriumeve dhe dhënia e shërbimeve mortore; ndërtimi, mirëmbajtja, rekonstruimi dhe mbrojtja e rrugëve lokale, rrugëve dhe objekteve të tjera të infrastrukturës; rregullimi i regjimit të komunikacionit; ndërtimi dhe mirëmbajtja e sinjalizimeve rrugore të komunikacionit, ndërtimi dhe mirëmbajtja e hapësirës publike të parkimit; mënjanimi i automjeteve të parkuara gabimisht; mënjanimi i automjeteve të dëmtuara nga sipërfaqet publike; ndërtimi dhe mirëmbajtja e tregjeve; pastrimi i oxhaqeve; mirëmbajtja dhe shfrytëzimi i parqeve, gjelbërimit, park - pyjeve dhe sipërfaqeve rekreative; rregullimi, mirëmbajtja dhe shfrytëzimi i shtratit të lumenjve në pjesët e urbanizuara; përcaktimi i emrave të rrugëve, shesheve, urave dhe objekteve

tjera të infrastrukturës.

5. Kultura - përkrahja institucionale dhe financiare të enteve dhe projekteve kulturore; kultivimi i folklorit, zakoneve, artizanateve të vjetra dhe vlerave të ngjashme kulturore; organizimi i manifestimeve kulturore; nxitja e formave të llojllojshme specifike të krijimtarisë.

6. Sporti dhe rekreacioni - zhvillimi i sportit masiv dhe i aktiviteteve rekreative; organizimi i shfaqjeve dhe manifestimeve sportive; mirëmbajtja dhe ndërtimi i objekteve për sport; përkrahja lidhjeve sportive;

7. Mbrojtja sociale dhe mbrojtja e fëmijëve - çerdhe për fëmijë dhe shtëpi të pleqve (pronësi, financim, investime dhe mirëmbajtje); realizimi i përkujdesjes sociale për persona invalidë; fëmijëve pa prindër dhe përkujdesje prindërore; fëmijëve me probleme edukativo-sociale; fëmijëve me nevoja të veçanta; fëmijëve nga familjet njëprindërore; fëmijëve në rrugë; personave të ekspozuar rrezikut social; personave të prekur nga keqpërdorimi i drogës dhe alkoolit; ngritja e vetëdijes së popullatës; strehimi i personave të rrezikuar social; realizimi i së drejtës dhe edukimi i fëmijëve të moshës parashkollore. Kryerja e këtyre kompetencave është në pajtueshmëri me Programin Nacional për zhvillim të mbrojtjes sociale;

8. Arsimi - themelimi, financimi dhe administrimi i shkollave fillore dhe të mesme, në bashkëpunim me pushtetin qendror, në pajtueshmëri me ligjin, organizimi i transportit dhe ushqimit të nxënësve dhe vendosjen e tyre në konvikte nxënësish;

9. Mbrojtja shëndetësore – të drejtuarit me rrjetin e organizatave publike shëndetësore dhe me objektet nga mbrojtja shëndetësore primare të cilët duhet ta përfshijnë përfaqësimin e vetëqeverisjes lokale në të gjitha këshillat të të gjitha organizatave në pronësi publike, edukata shëndetësore; përparimi i shëndetit; aktivitete preventive; mbrojtja e shëndetit të punëtorëve dhe mbrojtja gjatë punës; mbikëqyrja shëndetësore mbi mjedisin jetësor; mbikëqyrja mbi sëmundjet ngjitëse; ndihmë pacientëve me nevoja speciale (për shembull, shëndeti mental, keqpërdorimi i fëmijëve etj.) dhe lëmenj të tjerë që do të përcaktohen me ligj;

10. Zbatimi i përgatitjeve dhe ndërmarrja e masave për mbrojtjen dhe shpëtimin e qytetarëve dhe të mirave materiale nga shkatërrimet e luftës, nga fatkeqësitë natyrore dhe fatkeqësitë tjera dhe nga pasojat e shkaktuara nga to.

11. Mbrojtja kundër zjarrit që e kryejnë njësitë territoriale kundër zjarrit;

12. Mbikëqyrja mbi kryerjen e punëve nga kompetenca e sajë dhe

13. Punë të tjera të përcaktuara me ligj.

(2) Kompetencat nga paragrafi (1) i këtij neni, kryhen në përputhje me standardet dhe procedurat e caktuara me ligj.

(3) Me ligj përcaktohen punët në kompetencë të komunës të cilat ajo është e detyruar t'i kryej.

Neni 23

Kompetenca e deleguar

(1) Organet e administratës shtetërore mund t'ia delegojnë kryerjen e punëve të caktuara nga kompetencat e veta prefektit, në përputhje me ligjin.

(2) Në rastet nga paragrafi (1) i këtij neni barten edhe mjetet e parapara në buxhetin e Republikës së Maqedonisë për kryerjen e atyre punëve.

(3) Mënyra e kryerjes së punëve nga paragrafi (1) i këtij neni mund t'iu adaptohet kushteve lokale, me respektimin e standardeve të përcaktuara me ligj.

(4) Organi i administratës shtetërore nga paragrafi (1) i këtij neni në mënyrë subsidiare është përgjegjës për kryerjen e punëve të deleguara.

Neni 24

Mënyra e kryerjes së kompetencave

- (1) Për kryerjen e kompetencave të veta komunat mund të themelojnë veprimtari publike në përputhje me ligjin.
- (2) Komuna mund t'ua delegojë kryerjen e punëve të caktuara me interes publik dhe me rëndësi lokale personave tjerë juridik ose fizik, në bazë të kontratës për kryerjen e punëve me interes publik, në përputhje me ligjin.
- (3) Komuna është subsidiarisht përgjegjëse për kryerjen e punëve të interesit publik nga paragrafët (1) dhe (2) të këtij neni.

IV. PJESËMARRJA E DREJTPËRDREJTË E QYTETARËVE NË MARRJEN E VENDIMEVE NË KOMUNË

Neni 25

Format e pjesëmarrjes së qytetarëve

- (1) Qytetarët drejtpërdrejtë marrin pjesë në marrjen e vendimeve për çështjet me rëndësi lokale nëpërmjet iniciativave të qytetarëve, tubimeve të qytetarëve dhe referendumit në mënyrë dhe procedurë të përcaktuar me ligj.
- (2) Shpenzimet për realizimin e pjesëmarrjes së drejtpërdrejtë të qytetarëve në marrjen e vendimeve bien në ngarkesë të buxhetit komunal.

Neni 26

Iniciativa qytetare

- (1) Qytetarët kanë të drejtë t'i propozojnë këshillit që të sjell akt të caktuar ose të zgjedh një çështje të caktuar nga kompetencat e veta.
- (2) Iniciativë qytetare nuk mund të paraqitet për çështje kadrovike dhe financiare.
- (3) Për propozimin nga paragrafi (1) këshilli është i obliguar që të debatojë nëse e mbështesin më së paku 10 % e zgjedhësve të komunës, respektivisht të vetëqeverisjes vendore të cilës I dedikohet çështja e përcaktuar.
- (4) Debatin nga paragrafi (3) i këtij neni, këshilli është i obliguar ta mbajë më së voni në afat prej 90 ditësh pas iniciativës së dorëzuar dhe t'i informojë qytetarët për vendimin e vet.

Neni 27

Tubimi i qytetarëve

- (1) Tubimi i qytetarëve mund të thirret për territorin e mbarë komunës ose për territorin e vetëqeverisjes vendore.
- (2) Tubimin e qytetarëve e thërret prefekti i komunës me iniciativë të vet, me kërkesë të këshillit ose me kërkesë të më së paku 10 % të zgjedhësve të komunës, respektivisht të vetëqeverisjes vendore të cilës i dedikohet çështja e përcaktuar.

(3) Organet e komunës janë të obliguara që në afat prej 90 ditësh t'i shqyrtojnë konkluzat e sjellura në tubimin e qytetarëve dhe t'i marrin parasysh gjatë marrjes së vendimeve dhe sjelljes së masave lidhur me çështjet që u dedikohen, si dhe t'i informojnë qytetarët për vendimet e veta.

Neni 28

Referendumi

(1) Qytetarët përmes referendumit mund të vendosin për çështje nga kompetencat e komunës, si dhe për çështje të tjera me rëndësi lokale.

(2) Këshilli është i obliguar të shpall referendum me kërkesë të më së paku 20% të zgjedhësve në komunë.

(3) Këshilli mund të shpall referendum për çështje nga kompetencat e veta me iniciativë të vet.

(4) Vendimi i dalur nga referendumi është obligues për këshillin.

Neni 29

Parashtresat dhe propozimet

(1) Çdo qytetarë ka të drejtë, vet ose bashkë me të tjerë të paraqesë parashtresa dhe propozime për punën e organeve të komunës dhe administratës komunale.

(2) Prefekti është i obliguar:
- të krijojë kushte për paraqitjen e parashtresave dhe propozimeve;
- më së voni në afat prej 60 ditësh nga dita e pranimit të parashtresës, respektivisht propozimit, parashtresit t'i dorëzojë përgjigje me arsyetim dhe
- parashtresat dhe propozimet që nuk kanë të bëjnë me punët nga kompetencat e organeve të komunës t'i dorëzojë deri te organi kompetent dhe për këtë ta njoftojë parashtresin.

Neni 30

Tribunat e hapura, anketat dhe propozimet

Gjatë hartimit të dispozitave të komunës, këshilli, respektivisht prefekti mundet paraprakisht të organizojë tribuna publike, të realizojë anketa ose të kërkojë propozime nga qytetarët.

V. ORGANIZIMI DHE PUNA E ORGANEVE TË KOMUNËS

Neni 31

Organet e komunës

Organe të komunës janë: këshilli dhe prefekti.

Neni 32

Mënyra e punës së këshillit të komunës

(1) Këshilli është organ përfaqësues i qytetarëve i cili vendos në suaza të kompetencave të komunës.

(2) Për shqyrtimin e çështjeve dhe përcaktimin e propozimeve nga lëmenjtë përkatëse këshilli nga përbërja e vet mund të formojë komisione të përhershme dhe të përkohshme.

(3) Përbërja dhe mënyra e zgjedhjes së anëtarëve të komisioneve nga paragrafi (2) i këtij neni rregullohen me statutin.

(4) Përbërja e komisioneve nga paragrafi (2) i këtij neni përkon me përfaqësimin proporcional të partive politike në këshill.

Neni 33

Zgjedhja e anëtarëve të këshillit

(1) Këshillin e përbëjnë përfaqësues të qytetarëve të zgjedhur në zgjedhje të përgjithshme, të drejtpërdrejta dhe të lira me votim të fshehtë.

(2) Zgjedhja e anëtarëve të këshillit rregullohet me ligj.

Neni 34

Numri i anëtarëve të këshillit

Numri i anëtarëve të këshillit përcaktohet varësisht nga numri i banorëve në komunë dhe nuk mund të jetë më pak se nëntë as më shumë se 33 anëtarë, dhe atë në komunat me:

banorë	anëtarë të këshillit
deri 5.000	9
prej 5.001 deri 10.000	11
prej 10.001 deri 20.000	15
prej 20.001 deri 40.000	19
prej 40.001 deri 60.000	23
prej 60.001 deri 80.000	27
prej 80.001 deri 100.000	31
mbi 100.000	33

Neni 35

Statusi i anëtarëve të këshillit

(1) Anëtarët e këshillit zgjedhën me mandat katërvjeçar.

(2) Anëtarët e këshillit i përfaqësojnë qytetarët dhe në këshill vendosin sipas bindjeve të tyre.

(3) Anëtari i këshillit nuk mund të revokohet.

Neni 36

Kompetencat e këshillit

- (1) Këshilli:
1. Sjell statutin e komunës dhe dispozita të tjera;
 2. Sjell buxhetin dhe llogarinë vjetore të komunës;
 3. Përcakton shumën e burimeve personale të të ardhurave të financimit të komunës, në suaza të përcaktuara me ligj;
 4. Themelon veprimtari publike në suaza të kompetencave të komunës dhe bënë mbikëqyrjen mbi punën e tyre;
 5. Emëron anëtarë të këshillave drejtues të veprimtarive publike të cilat i themelon;
 6. Sjell programe për punë dhe plane financiare për financim të veprimtarive publike që i ka themeluar komuna;
 7. I miraton raportet për realizimin e buxhetit dhe llogarinë vjetore të komunës;
 8. Vendos për dhënien e lejeve për kryerje të veprimtarisë të interesit publik me rëndësi lokale në përputhje me ligjin;
 9. I miraton raportet për punën e veprimtarive publike që i ka themeluar komuna;
 10. Vendos për mënyrën e disponimit me pronën e komunës.
 11. Vendos mbi mënyrën e kryerjes së kontrollit financiar të buxhetit të komunës në përputhje me ligjin.
 12. Zgjedh personin që udhëheq me njësinë rajonale të ministrisë për punë të brendshme në komunë, në përputhje me ligjin;
 13. Shqyrton dhe miraton raportin vjetor për sigurinë publike në territorin e komunës, të cilin e dorëzon deri te ministri i punëve të brendshme dhe avokati popullor;
 14. Mund t'i jep rekomandime personit udhëheqës të njësisë rajonale të ministrisë për punë të brendshme nga fusha e sigurisë publike dhe sigurisë në komunikacion dhe
 15. Kryen edhe punë të tjera të përcaktuara me ligj.

(2) Nëse këshilli nuk i miraton raportet nga paragrafi (1) nënparagrafi (7) dhe (9) të këtij neni mund të ngrejë procedurë për kryerjen e kontrollit të punës materiale dhe financiare pranë organit kompetent për mbikëqyrje.

(3) Personi udhëheqës nga paragrafi (1) nënparagrafi 12 i këtij neni është zgjedhur nëse për të kanë votuar shumica e gjithë këshillave të komunave të cilat i përfshin njësia rajonale e ministrisë për punë të brendshme.

Neni 37

Konstituimi i këshillit

(1) Seancën e parë të këshillit të ri të zgjedhur e thërret kryetari i këshillit nga përbërja paraprake më së voni në afat prej 20 ditësh nga dita e përfundimit të zgjedhjeve.

(2) Nëse këshilli nuk thirret në afatin nga paragrafi (1) i këtij ligji, anëtarët e këshillit tubohen vet dhe nën kryesimin e anëtarit më të vjetër të këshillit e konstituojnë këshillin në afat prej 10 ditësh pas skadimit të afatit nga paragrafi (1) i këtij neni.

(3) Nëse seanca nuk mbahet në afatin nga paragrafi (2) të këtij neni do të shpallen zgjedhje të reja për anëtarë të këshillit, në mënyrë të përcaktuar me ligj.

Neni 38

Betimi

Anëtarët e ri të zgjedhur në seancën konstitutive të këshillit japin dhe nënshkruajnë deklaratë solemne me këtë përmbajtje:
"Unë (emri dhe mbiemri) solemnisht deklaroj se detyrat dhe obligimet e anëtarit të këshillit do t'i

kryej me ndërgjegje dhe gjatë kryerjes së tyre do ta respektojnë Kushtetutën, ligjin, dhe dispozitat e këshillit dhe do ta mbrojnë rendin kushtetues të Republikës së Maqedonisë”.

Neni 39

Thirrja e seancave të këshillit

- (1) Seancat e këshillit thirren sipas nevojës por më së paku njëherë në tre muaj.
- (2) Seancat i thërret kryetari i këshillit me iniciativë të vet, me kërkesë të prefektit ose me kërkesë të më së paku $\frac{1}{4}$ të anëtarëve të këshillit më së voni në afat prej 15 ditësh nga dita e paraqitjes së sajë.
- (3) Nëse në afat të përcaktuar në paragrafin (2) të këtij neni kryetari i këshillit nuk e thërret mbledhjen e këshillit, anëtarët e këshillit tubohen vet dhe zgjedhin kryetar për atë seancë.
- (4) Dita, ora dhe vendi i mbajtjes së seancave të këshillit si dhe propozimi i rendit të ditës sipas të cilit do të punohet, detyrimisht shpallen më së voni shtatë ditë para ditës së mbajtjes së seancës, në mënyrë të përcaktuar me statutin.

Neni 40

Thirrja e seancës së jashtëzakonshme të këshillit

- (1) Seancë të jashtëzakonshme të këshillit thërret kryetari i këshillit, me iniciativë të vet ose me kërkesë të më së paku $\frac{1}{3}$ të anëtarëve të këshillit, në raste dhe në mënyrë të përcaktuar me statut.
- (2) Në njoftimin për thirrjen e seancës së jashtëzakonshme theksohet koha, vendi i mbajtjes dhe rendi i ditës së seancës.
- (3) Këshilli nuk mund ta ndërrojë rendin e ditës të seancës së jashtëzakonshme.
- (4) Para fillimit të seancës detyrimisht votohet për arsyetimin e shkaqeve të thirrjes së seancës së jashtëzakonshme.

Neni 41

Puna e seancave të këshillit

- (1) Këshilli mund të punojë nëse në seancë merr pjesë shumica nga numri i përgjithshëm i anëtarëve të këshillit.
- (2) Këshilli vendos me shumicë votash nga anëtarët e pranishëm, nëse me ligj dhe me statutin nuk është përcaktuar ndryshe.
- (3) Dispozitat që kanë të bëjnë me kulturën, përdorimin e gjuhëve dhe shkrimit në të cilën flasin më pak se 20% nga qytetarët në komunë, përcaktimi dhe përdorimi i stemës dhe flamurit të komunës miratohen me shumicë votash të anëtarëve të pranishëm të këshillit, me çrast patjetër të ketë shumicë votash të anëtarëve të pranishëm të këshillit të cilët i takojnë bashkësive të cilët nuk janë shumicë e popullatës së komunës.
- (4) Në seancat e këshillit, parimisht, votohet në mënyrë publike.
- (5) Për çdo mbledhje të këshillit mbahet procesverbal.

Neni 42

Publiku në punën e këshillit

- (1) Këshilli punon në seanca.
- (2) Seancat e këshillit janë publike.
- (3) Për përjashtimin e prezencës së publikut në seancë vendoset nëse për të ekzistojnë shkaqe të arsyeshme të përcaktuara me statut, me dy të tretën e votave nga numri i përgjithshëm i anëtarëve të këshillit.
- (4) Në debatin për buxhetin e komunës, llogarinë përfundimtare të buxhetit dhe planet urbanistike, prania e publikut nuk mund të përjashtohet.

Neni 43

Të drejtat dhe obligimet e anëtarëve të këshillit

- (1) Anëtarët e këshillit kanë të drejtë dhe obligim të jenë prezent dhe të marrin pjesë në punën e këshillit dhe në komisionet e tij të përhershme dhe të përkohshme.
- (2) Anëtarët kanë të drejtë në seancat e këshillit të japin iniciativa dhe propozime dhe t'i parashtrojnë pyetje prefektit.
- (3) Anëtari i këshillit nuk mund të thirret në përgjegjësi penale ose të arrestohet për mendimin e shfaqur ose për votim në këshill.
- (4) Punëdhënësi është i detyruar ta lirojë nga puna profesionale anëtarin e këshillit për të marrë pjesë në seancat e këshillit ose komisioneve ku ai është anëtar.
- (5) Anëtarët e këshillit kanë edhe të drejta dhe obligime të tjera të përcaktuara me statutin dhe dispozitat tjera në përputhje me këtë ligj.

Neni 44

Konflikti i interesave të anëtarëve të këshillit

- (1) Anëtari i këshillit nuk mund të marrë pjesë në procesin e sjelljes së vendimeve për çështje në të cilat ai ose bashkëshorti i tij, fëmija ose kushërinjtë deri në brezin e dytë anësor kanë interes personal financiar ose interes tjetër.
- (2) Anëtari i këshillit është i obliguar ta informojë këshillin për çështjet për të cilat ai ka interes financiar ose interes tjetër personal.
- (3) Anëtari i këshillit nuk mund të jetë i punësuar në administratën komunale të komunës ku ai është i zgjedhur.
- (4) Nga dita e punësimit në përputhje me paragrafin (3) të këtij neni do të konsiderohet se anëtari i këshillit ka dhënë dorëheqje.

(5) Anëtar i këshillit i punësuar në veprimtaritë publike që i ka themeluar komuna, nuk mund të marrë pjesë në marrjen e vendimeve për çështje që kanë të bëjnë me veprimtarinë publike në të cilën është i punësuar.

Neni 45

Kompensimet e anëtarëve të këshillit

Anëtarët e këshillit kanë të drejtë kompensimi për pjesëmarrje në seanca dhe kompensim të shpenzimeve ditore dhe të rrugës, në suaza të përcaktuara me ligj.

Neni 46

Ndërprerja e mandatit

(1) Anëtarit të këshillit i pushon mandati para skadimit të kohës për të cilën është zgjedhur:

- nëse jep dorëheqje;
- në rast vdekjeje;
- nëse me vendim të plotfuqishëm, për vepër penale, është dënuar me burgim në kohëzgjatje më shumë se gjashtë muaj.
- nëse paraqitet rast i pa përputhshmërisë me funksionin anëtarë i këshillit në përputhje me Ligjin për zgjedhje lokale;
- nëse me vendim të plotfuqishëm i merret e drejta e aftësisë për punë; dhe
- nëse pushon të jetë banor i komunës.

(2) Këshilli në mbledhjen e parë të ardhshme, do ta konstatojë shkakun dhe ditën e ndërprerjes së mandatit të anëtarit të këshillit, dhe atë:

- në rastet nga paragrafi (1) nënparagrafi 1, nga dita e mbajtjes së seancës dhe
- në rastet nga paragrafi (1) nënparagrafët 2, 3,4,5 dhe 6 me ditën e plotësimit të kushtit.

(3) Anëtarit të këshillit mund t'i merret mandati nëse pa arsye mungon nga seancat tri herë radhazi.

(4) Për arsyeshmërinë e mungesës nga paragrafi (3) të këtij neni vendos këshilli me shumicë votash nga numri i përgjithshëm i anëtarëve të këshillit.

Neni 47

Zgjedhja e kryetarit të këshillit

(1) Kryetari i këshillit zgjedhet nga përbërja e anëtarëve të këshillit, me mandat katërvjeçar.

(2) Për kryetar të këshillit zgjedhet kandidati i cili ka fituar shumicën e votave nga numri i përgjithshëm i anëtarëve të këshillit.

(3) Nëse në rrethin e parë asnjëri nga kandidatët për kryetar nuk ka fituar numër të mjaftueshëm të votave, kalohet në rrethin e dytë të votimeve për dy kandidatët që në rrethin e parë kanë fituar më shumë vota.

(4) Për kryetar është zgjedhur anëtar i këshillit i cili në rrethin e dytë të votimit ka fituar më shumë vota.

(5) Deri në zgjedhjen e kryetarit, seancat e këshillit i thërret dhe me ato udhëheq anëtar më i vjetër i këshillit.

Neni 48

Obligimet e kryetarit të këshillit

- Kryetari i këshillit:
- 1) I thërret dhe udhëheq me seancat e këshillit;
 - 2) Kujdeset për organizimin dhe punën e këshillit dhe
 - 3) I nënshkruan dispozitat që i ka sjellur këshilli dhe në afat prej tre ditësh nga dita e sjelljes ia dorëzon prefektit për publikim.

Neni 49

Zgjedhja e prefektit

Prefekti zgjedhet çdo katër vite në zgjedhje të përgjithshme, të drejtpërdrejta dhe të lira me votim të fshehtë në përputhje me ligjin me të cilin rregullohen zgjedhjet lokale.

Neni 50

Kompetencat e prefektit

- (1) Prefekti:
1. E përfaqëson dhe prezanton komunën
 2. E kontrollon ligjshmërinë e dispozitave të këshillit;
 3. I shpall dispozitat e këshillit në gazetën zyrtare të komunës;
 4. E siguron zbatimin e vendimeve të këshillit;
 5. E siguron kryerjen e punëve të cilat me ligj i janë deleguar komunës;
 6. Inicion dhe propozon sjelljen e dispozitave nga kompetencat e këshillit;
 7. E propozon buxhetin vjetor të komunës dhe llogarinë vjetore të buxhetit të komunës.
 8. E realizon buxhetin e komunës;
 9. Zgjedh drejtorë të veprimtarive publike që i ka themeluar komuna, në bazë të konkursit publik.
 10. Rregullisht e njofton këshillin për kryerjen e kompetencave të veta në përputhje me statutin;
 11. Vendos në punë administrative për të drejtat, obligimet dhe interesat e personave juridik dhe fizik, në përputhje me ligjin.
 12. Sjell rregullore për sistematizimin e vendeve të punës të administratës komunale;
 13. Udhëheq me administratën komunale;
 14. Vendos për punësimin, të drejtat, obligimet dhe përgjegjësitë e të punësuarve në administratën e komunës, nëse ndryshe nuk është e përcaktuar me ligj;
 15. Siguron shfrytëzim të drejtë dhe ligjor, mirëmbajtje dhe mbrojtje të pronës së komunës, në përputhje me ligjin dhe statutin;
 16. Kryen punë të tjera të përcaktuara me ligj dhe me statutin.

(2) Prefekti mund të autorizojë nëpunës udhëheqës së komunës që të udhëheq procedurën dhe të vendos për punë administrative si dhe të nënshkruaj akte.

Neni 51

Kontrolli i ligjshmërisë së dispozitave para shpalljes së tyre

(1) Nëse prefekti vlerëson se dispozita e këshillit nuk është në përputhje me Kushtetutën dhe ligjet është i obliguar që në afat prej shtatë ditësh nga dita e dorëzimit, me vendim t'a ndërpresë shpalljen e tij, me të cilin do t'i arsyetojë shkaqet e ndërprerjes.

(2) Këshilli është i obliguar, në afat prej 15 ditësh nga dita e shpalljes të vendimit nga paragrafi 1 i këtij neni, ta shqyrtoj vendimin dhe të vendos në lidhje me të.

(3) Nëse këshilli e vërteton dispozitën, prefekti është i obliguar ta shpall dhe njëkohësisht të paraqesë iniciativë për ngritjen e procedurës për vlerësimin e kushtetutshmërisë dhe ligjshmërisë së dispozitës së kontestuar para Gjyqit kushtetues të Republikës së Maqedonisë.

(4) Për iniciativën nga paragrafi (3) të këtij neni prefekti është i obliguar që ta informojë ministrinë kompetente për kryerjen e punëve që i përkasin vetëqeverisjes lokale.

Neni 52

Kryerja e funksionit të prefektit

(1) Prefekti i sapo zgjedhur e pranon detyrën nga prefekti i mëparshëm në afat prej shtatë ditësh prej ditës së zgjedhjes.

(2) Prefekti në mënyrë profesionale e kryen funksionin e vet.

(3) Gjatë kohës së ushtrimit të funksionit prefekti nuk mund të kryej detyra tjera profesionale.

(4) Prefekti nuk mund të merret në përgjegjësi penale ose të arrestohet për mendimin e shfaqur në këshill.

(5) Prefekti cakton se cili nga anëtarët e këshillit do ta zëvendësojë në rast pengese ose mungese, në përputhje me procedurën e përcaktuar me statut.

(6) Anëtarit të këshillit i pushon funksioni i anëtarit të këshillit gjatë kohës kur e zëvendëson prefektin.

(7) Kryetari i këshillit nuk mund ta zëvendësojë prefektin.

(8) Rroga dhe kompensimet e prefektit, si dhe kompensimi për anëtarin e këshillit i cili e zëvendëson prefektin, rregullohen me ligj.

Neni 53

Konflikti i interesave të prefektit

(1) Prefekti nuk mund të emërohet për anëtar i organeve mbikëqyrëse, administrative, kontrolluese të shoqatave tregtare dhe veprimtarive publike.

(2) Prefekti nuk mund të marrë pjesë në procesin e sjelljes së vendimeve për çështje në të cilat ai ose bashkëshorti, fëmijët ose kushërinjtë deri në brezin e dytë anësor kanë interes personal financiar ose interes tjetër.

(3) Kryetari i komunës është i obliguar që ta njoftojë këshillin për interesin nga paragrafi (2) të këtij neni.

(4) Në rast të paragrafit (2) të këtij neni vendimin e sjell njëri nga anëtarët e këshillit i zgjedhur në të njëjtën mënyrë siç zgjedhet kryetari i këshillit.

Neni 54

Ndërprerja e mandatit të prefektit

(1) Prefektit i ndërpritet mandati sipas fuqisë së ligjit:
- nëse paraqet dorëheqje;
- në rast vdekjeje;
- nëse me vendim të plotfuqishëm është i dënuar për vepër penale me dënim me burg në kohëzgjatje mbi gjashtë muaj;
- nëse me vendim të plotfuqishëm i merret e drejta e aftësisë për punë;
- nëse paraqitet gjendja e papërputhshmërisë për kryerjen e funksionit në pajtim me Ligjin për zgjedhje lokale;
- në rast të mungesës së paarsyeshme më gjatë se gjashtë muaj dhe nëse pushon të jetë banor i komunës.

(2) Për asryshmërinë e mungesës nga paragrafi (1) nënparagrafi 6 të këtij neni, vendos këshilli me 2/3 të shumicës së votave nga numri i përgjithshëm i anëtarëve të këshillit.

(3) Anëtari i këshillit që e zëvendëson prefektin, në afat prej 15 ditësh nga dita e paraqitjes të njërit nga rastet nga paragrafi (1) të këtij neni është i obliguar për atë ta njoftojë ministrinë kompetente për punët që i përkasin vetëqeverisjes lokale;

(4) Ministria kompetente për kryerjen e punëve që i përkasin vetëqeverisjes lokale, në afat prej 15 ditësh nga dita e pranimit të njoftimit nga paragrafi (3) i këtij neni e njofton Qeverinë e Republikës së Maqedonisë, e cila në afat prej një muaj nga dita e pranimit të njoftimit, konstaton se është paraqitur njëri nga rastet e paragrafit (1) të këtij neni dhe njëkohësisht inicon procedurë për shpalljen e zgjedhjeve të reja për prefekt, në përputhje me ligjin.

(5) Këshilli, në afat prej 30 ditësh nga dita e shpalljes së vendimit të qeverisë nga paragrafi (4) të këtij neni, do të zgjedh një nga anëtarët e këshillit i cili do ta kryejë detyrën e prefektit për periudhën deri në zgjedhjen e prefektit të ri, në mënyrë siç zgjedhet kryetari i këshillit.

(6) Anëtarit të këshillit i pushon funksioni anëtar i këshillit në kohën e kryerjes së detyrës së prefektit në përputhje me paragrafin 5 të këtij neni.

(7) Zgjedhjet nga paragrafi 4 të këtij neni nuk do të mbahen nëse deri në periudhën e re zgjedhore ka më pak se gjashtë muaj.

Neni 55

Komisioni për marrëdhënie ndërmjet bashkësive

(1) Në komunën në të cilën mbi 20% nga numri i përgjithshëm i banorëve të komunës, i caktuar në regjistrimin e fundit të kryer të popullsisë janë përfaqësues të bashkësisë përkatëse formohet komision për marrëdhënie ndërmjet bashkësive.

(2) Komisionin nga paragrafi (1) të këtij neni e përbëjnë numër i njëjtë i përfaqësuesve nga secila bashkësi e përfaqësuar në komunë.

(3) Mënyra e zgjedhjes së anëtarëve të komisionit përcaktohet me statut.

(4) Komisioni i shqyrton çështjet që i përkasin marrëdhënieve ndërmjet bashkësive të përfaqësuara në komunë dhe jep mendime dhe propozime për zgjidhjen e tyre.

(5) Këshilli i komunës është i obliguar që t'i shqyrtojë mendimet dhe propozimet nga paragrafi (4) i këtij neni dhe të sjell vendim në lidhje me ta.

Neni 56

Këshilli për mbrojtjen e konsumatorëve

(1) Për shqyrtimin e çështjeve dhe përcaktimin e propozimeve të cilët kanë të bëjnë me kualitetin e shërbimeve të veprimtarive publike të komunës, këshilli mund të formojë këshill për mbrojtjen e konsumatorëve, i përbërë nga përfaqësues të grupeve më të mëdha të shfrytëzuesve të shërbimeve publike.

(2) Përbërja, mënyra e zgjedhjes së anëtarëve dhe fushëveprimi i punës së këshillit nga paragrafi (1) i këtij neni, rregullohen me statutin.

VI. ADMINISTRATA KOMUNALE

Neni 57

Organizimi i administratës komunale

(1) Për kryerjen e punëve nga kompetencat e organeve të komunës organizohet administrata komunale.

(2) Administrata komunale organizohet në sektorë dhe në njësi. Komuna mund të organizojë inspektorat komunal për kryerjen e mbikëqyrjes inspektuese në kryerjen e punëve në kompetenca të saja.

(3) Komuna mund të organizojë inspektorat komunal për kryerjen e mbikëqyrjes inspektuese mbi kryerjen e punëve nga kompetenca e sajë.

(4) Organizimin, fushëveprimin dhe mënyrën e kryerjes së detyrave të administratës komunale i përcakton këshilli, në bazë të propozimit të prefektit.

Neni 58

Statusi i të punësuarve në komunë

(1) Të punësuarit në administratën komunale që kryejnë punë profesionale, normativo - juridike, ekzekutive, administrativo - mbikëqyrëse dhe zgjidhin punë administrative kanë status të nëpunësit shtetëror.

(2) Për punësimin, të drejtat dhe obligimet, sistemin e rrogave dhe kompensimet e rrogave, përgjegjësinë, vlerësimin dhe ndërprerjen e marrëdhënies së punës të të punësuarve nga paragrafi (1) të këtij neni do të zbatohen dispozitat e Ligjit për nëpunësit shtetëror.

(3) Për të punësuarit në administratën komunale të cilët kryejnë punë administrativo - teknike dhe ndihmëse zbatohen dispozitat nga legjislacioni punues.

Neni 59

Përfshirja e bashkësive gjatë punësimit

Gjatë punësimit, në administratën komunale dhe në veprimtaritë publike që i ka themeluar komuna do të mbahet llogari për përfshirje të drejtë dhe përkatëse të qytetarëve të cilët u përkasin të gjitha

bashkësive të përfshira në komunë në të gjitha nivelet, si dhe respektimi i kriterëve për kompetencë dhe profesionalizëm.

Neni 60

Obligimet e administratës komunale

Administrata komunale:

1. I përgatit aktet për këshillin dhe prefektin;
2. I përgatit seancat e këshillit, si dhe seancat e komisioneve të tij të përhershme dhe të përkohshme;
3. Kryen detyra profesionale për këshillin dhe prefektin e komunës;
4. E mban kontabilitetin e komunës.
5. E ndjek problematikën e lëmenjve në kompetencë të komunës, kryen analizë për gjendjen dhe jep iniciativa dhe propozime për zgjidhjen e tyre;
6. Dorëzon informata dhe të dhëna në lidhje me aktivitetet e komunës me kërkesë të organeve kompetente ose në bazë të ligjit;
7. Disponon me dokumentet e komunës dhe i ruan deri në zhdukjen e tyre respektivisht dorëzimin në Arkivin shtetëror të Republikës së Maqedonisë; dhe
8. Kryen edhe punë të tjera që do t'ia caktojë këshilli dhe kryetari i komunës.

Neni 61

Formimi dhe ndërprerja e administratës së përbashkët

(1) Trupat e përbashkëta administrative për kryerjen e kompetencave të veçuara do të formohen ose ndërpriten në bazë të vendimit të sjellur me shumicë votash nga numri i përgjithshëm i anëtarëve të çdo këshilli të komunës.

(2) Në bazë të vendimeve të paragrafit (1) të këtij neni lidhet kontratë me shkrim në të cilin përcaktohen: komunat të cilat e themelojnë trupin e përbashkët administrativ; selia e organit të përbashkët administrativ, lloji, vëllimi dhe mënyra e kryerjes së aktiviteteve; shfrytëzimi i objekteve dhe pajisjeve; financimi; mënyra e ndërprerjes dhe kontrolli i punës së trupit administrativ.

(3) Kontrata nga paragrafi (2) i këtij neni botohet në "Gazetën Zyrtare të Republikës së Maqedonisë".

VII. AKTET E ORGANEVE TË KOMUNAVE

Neni 62

Dispozitat e këshillit

(1) Për kryerjen e detyrave nga kompetencat e veta këshilli sjell dispozita, dhe atë: statut, programe, plane, vendime dhe dispozita të tjera të përcaktuara me ligj.

(2) Dispozitat sillen me shumicë votash nga numri i përgjithshëm i anëtarëve të këshillit, nëse ndryshe nuk është përcaktuar me këtë ose me tjetër ligj.

(3) Dispozitat për kryerjen e të cilave janë të nevojshme mjete financiare patjetër të përmbajnë edhe dispozita me të cilat definojnë burimet dhe lartësia e mjeteve për kryerjen e tyre.

(4) Dispozitat shpallen në gazetën zyrtare të komunës më së voni në afat prej shtatë ditësh nga dita e sjelljes së tyre.

(5) Dispozitat nga paragrafi (1) i këtij neni hynë në fuqi ditën e tetë nga dita e shpalljes, nëse me statutin nuk është përcaktuar ndryshe.

(6) Komuna mban përmbledhje të dispozitave të shpallura e cila është e hapur për shikim të përgjithshëm.

Neni 63

Aktet e prefektit

Për zgjidhjen e të drejtave të veçanta, obligimeve dhe interesave të personave fizikë dhe juridikë, prefekti sjell vendime.

VIII. PRONA E KOMUNËS

Neni 64

Prona e komunës

(1) Komuna ka të drejtë në pronësi në sende, në para dhe të drejta.

(2) Vlera e pronës së komunës vlerësohet dhe shprehet gjatë përgatitjes së llogarisë vjetore.

(3) Me pronën komuna disponon dhe ekonomizon si nikoqir i mirë, në mënyrë të përcaktuar me ligj.

Neni 65

Pronësia në veprimtaritë publike

Veprimtaritë publike të themeluara nga komuna, janë pronë e saj.

Neni 66

Shitja e sendeve në pronësi të komunës

(1) Komuna mund të shes sende në pronësi të komunës vetëm nëpërmjet ankandit publik në përputhje me ligjin.

(2) Çmimi shitës i sendeve nga paragrafi (1) i këtij neni nuk guxon të jetë më i vogël nga vlera e tyre e tregut.

(3) Mjetet financiare të fituara nga shitja e sendeve në pronësi të komunës, mund të investohen vetëm për përfitim të sendeve të reja ose rikonstruktim të sendeve ekzistuese në pronësi të komunës.

Neni 67

Dhënia e pronës së komunës në shfrytëzim

Sendet në pronësi të komunës mund t'u jepen në shfrytëzim subjekteve të tjerë me anë të ankandit publik në përputhje me ligjin.

Neni 68

Të mirat në përdorim të përgjithshëm

Komuna kujdeset për shfrytëzimin ligjor dhe të drejtë të të mirave në përdorim të përgjithshëm.

IX. MBIKËQYRJA MBI PUNËN E ORGANEVE TË KOMUNËS

Neni 69

Llojet dhe mënyra e kryerjes së mbikëqyrjes

(1) Mbikëqyrja mbi punën e organeve të komunës në kryerjen e kompetencave të saja e përfshinë mbikëqyrjen mbi ligjshmërinë, kontrollin dhe revizionin mbi punën materiale dhe financiare.

(2) Mbikëqyrja mbi punën e organeve të komunës mbi kryerjen e punëve të deleguara nga kompetencat e organeve të administratës shtetërore e përfshinë mbikëqyrjen mbi ligjshmërinë dhe mbikëqyrjen mbi efikasitetin.

(3) Në rastet e përcaktuara me ligj, bëhet edhe mbikëqyrje paraprake e cila e përfshinë pëlqimin paraprak të dispozitave të komunës.

(4) Mënyra dhe veprimi i kryerjes së mbikëqyrjes mbi punën e organeve të komunës është përcaktuar me ligj.

(5) Organet e komunës janë të obliguara të bashkëpunojnë me organet për kryerjen e mbikëqyrjes.

Neni 70

Organet për kryerjen e mbikëqyrjes

(1) Mbikëqyrjen mbi ligjshmërinë e dispozitave të komunës e kryen ministria kompetente për kryerjen e punëve të vetëqeverisjes lokale.

(2) Mbikëqyrjen mbi ligjshmërinë e punës së organeve të komunës e kryen organet e administratës shtetërore.

(3) Kontrollin e punës materiale dhe financiare të komunës e kryen ministria për financë.

(4) Revizionin mbi punën materiale dhe financiare të komunës e kryen Enti shtetëror për revizion në përputhje me ligjin për revizion shtetëror.

(5) Mbikëqyrjen mbi kompetencat e deleguara e kryen organi i administratës shtetërore kompetencat e të cilit i janë deleguar komunës.

Neni 71

Mbikëqyrja mbi ligjshmërinë e dispozitave të komunës

(1) Prefekti është i obliguar, në afat prej 10 ditësh nga dita e botimit të tyre, t'i dorëzojë dispozitat e komunës deri te ministria kompetente për kryerjen e punëve të vetëqeverisjes lokale.

(2) Nëse organi nga paragrafi (1) i këtij neni çmon se dispozita nuk është në përputhje me kushtetutën dhe ligjin, në afat prej 45 ditësh nga dita e dorëzimit të dispozitës, sjell vendim për ndërprerjen e zbatimit të dispozitës, me çrast i arsyeton edhe shkaqet e ndërprerjes.

(3) Vendimi nga paragrafi (2) i këtij neni shpallet në “Gazetën Zyrtare të Republikës së Maqedonisë”.

(4) Organi nga paragrafi (1) i këtij neni, në afat prej 30 ditësh nga dita e shpalljes së vendimit nga paragrafi (1) i këtij neni, deri te Gjyqi kushtetues i Republikës së Maqedonisë paraqet iniciativë për vlerësimin e kushtetutshmërisë dhe ligjshmërisë së dispozitës së ndaluar.

(5) Nëse procedura nuk ngritët në afatin e caktuar sipas paragrafit (4) të këtij neni ndërpritet vlefshmëria e vendimit për ndalesën e zbatimit të dispozitës nga paragrafi (1) i këtij neni, dhe dispozita e ndaluar bëhet ekzekutive.

Neni 72

Revizioni i punës materiale dhe financiare

(1) Enti shtetëror për revizion, kryen revizione të rregullta të llogarive financiare të komunave në përputhje me ligjin.

(2) Prefekti është i obliguar, në afat prej 30 ditësh nga dita e sjelljes, t’ia dorëzojë raportet për kryerjen e buxhetit dhe llogarinë përfundimtare të komunës Entit shtetëror për revizion.

(3) Raporti përfundimtar për revizionin i kryer iu dorëzohet organeve të komunës, ministrit kompetent për punët e vetëqeverisjes lokale dhe ministrit për financë.

Neni 73

Pëlqimi paraprak

(1) Nëse gjatë sjelljes së dispozitës së komunës kërkohet pëlqim paraprak nga organ tjetër, organi pëlqimin e jep më së voni në afat prej 60 ditësh nga dita kur i është dorëzuar propozim dispozita.

(2) Nëse pëlqimi paraprak nuk merret në afat nga paragrafi (1) i këtij neni, dispozita konsiderohet si e pranuar ashtu siç ka qenë e propozuar nga komuna.

X. SHPËRNDARJA E KËSHILLIT TË KOMUNËS

Neni 74

Shpërndarja e këshillit me vetiniciativë

Këshilli i komunës shpërndahet nëse për atë deklarohet shumica nga numri i përgjithshëm i anëtarëve të tij.

Neni 75

Kushtet për shpërndarje të këshillit

(1) Këshilli shpërndahet nëse:
1. Sërish e miraton dispozitën që paraprakisht është anuluar ose ndërprerë me vendim të Gjyqit

kushtetues të Republikës së Maqedonisë.
2. Sjell vendim me të cilin rrezikohet sovraniteti dhe integriteti territorial i Republikës së Maqedonisë.
3. Nuk takohet për një periudhë më të gjatë se gjashtë muaj.
4. Nuk e miraton buxhetin dhe llogarinë përfundimtare të buxhetit deri në 31 mars të vitit vijues.

(2) Për paraqitjen e njërit nga kushtet nga paragrafi (1) i këtij neni prefekti është i obliguar që menjëherë ta njoftojë ministrinë kompetente për kryerjen e punëve nga lëmia e vetëqeverisjes lokale.

Neni 76

Procedura e shpërndarjes së këshillit

(1) Ministria kompetente për kryerjen e punëve nga lëmia e vetëqeverisjes lokale, në afat prej shtatë ditësh nga dita e pranimi të njoftimit nga neni 75 paragrafi (2) i këtij ligji, Qeverisë së Republikës së Maqedonisë do t'i paraqes propozim për shpërndarjen e këshillit.

(2) Qeveria e Republikës së Maqedonisë, në afat prej një muaj nga dita e pranimi të propozimit nga paragrafi (1) të këtij neni do të sjell vendim për shpërndarjen e këshillit sipas fuqisë ligjore, të cilin e shpall në "Gazetën Zyrtare të Republikës së Maqedonisë".

(3) Për periudhën e mbetur zgjedhore do të shpallen zgjedhje të reja për këshill në përputhje me Ligjin për zgjedhje lokale.

(4) Zgjedhjet nga paragrafi (3) të këtij neni nuk do të mbahen nëse deri te periudha e re zgjedhore ka më pak se gjashtë muaj.

Neni 77

Kryerja e punëve të këshillit

(1) Deri te zgjedhja e këshillit të ri, punët e këshillit i kryen prefekti i komunës.

(2) Gjatë kryerjes së punëve nga paragrafi (1) i këtij neni prefekti nuk mundet:

- të vendos për çështje që kanë të bëjnë me disponimin e pronës së komunës.
- të vendos për çështje në të cilat ai ose bashkëshorti i tij, fëmijët ose kushërinjtë deri në brezin e dytë të linjës anësore kanë interes financiar ose interes tjetër personal; dhe
- të sjell dispozita të parapara në nenin 36 të këtij ligji.

XI. MEKANIZMAT PËR BASHKËPUNIM NDËRMJET KOMUNAVE, QEVERISË SË REPUBLIKËS SË MAQEDONISË DHE ORGANEVE TË ADMINISTRATËS

Neni 78

Konsultimi i komunave

(1) Komunat, në kohë dhe në mënyrë përkatëse do të konsultohen gjatë procedurës së planifikimit dhe sjelljes së vendimeve për çështjet që u përkasin atyre.

(2) Komunat do të konsultohen për planifikimin e punëve publike gjatë përgatitjes së planit hapësinor të Republikës.

(3) Mënyra e konsultimit nga paragrafi (1) dhe (2) të këtij neni do të përcaktohet me ligjet nga lëmenjtë përkatës.

Neni 79

Marrëveshjet për bashkëpunim ndërmjet shtetit dhe komunave

(1) Qeveria, për shkak të koordinimit gjatë planifikimit, programimit dhe implementimit të politikave në fusha të caktuara ose grupe, mund të lidh marrëveshje për bashkëpunim me një ose me më shumë komuna në lëmenj të interesit të ndërsjellë.

(2) Kuvendi i Republikës së Maqedonisë do të informohet për marrëveshjet për bashkëpunim nga paragrafi (1) i këtij neni.

Neni 80

Bashkëpunimi ndërmjet Qeverisë dhe komunave

(1) Qeveria bashkëpunon me komunat për çështjet që janë në interes të tyre dhe atë:
- ligjet që kanë të bëjnë me komunat;
- shuma e dotacionit të përgjithshëm që duhet t'u ndahet komunave gjatë vitit vijues kalendarik.
- burimet e financimit të kompetencave.

(2) Për bashkëpunimin për çështjet e theksuara në paragrafin (1) të këtij neni përgatitet raport në të cilin përfshihen çështjet për të cilat është arritur pajtueshmëri dhe çështjet për të cilat nuk ka pajtueshmëri.

(3) Me ligjin që ka të bëjë me çështjet nga paragrafi (1) i këtij neni deri te Kuvendi i Republikës së Maqedonisë dorëzohet edhe raporti nga paragrafi (2) i këtij neni.

Neni 81

Shoqata e komunave të Republikës së Maqedonisë

(1) Shoqata e komunave në të cilën me qëllim të mbrojtjes dhe përparimit të interesave të përbashkëta janë bashkuar më shumë se 2/3 e komunave nga mbarë territori i Republikës së Maqedonisë ka të drejtë të:
- bashkëpunojë me qeverinë për çështjet me interes për komunat në Republikën e Maqedonisë;
- iniciojë sjelljen e ligjeve që kanë të bëjnë me përparimin e vetëqeverisjes lokale
- jep propozime për projektimin e buxhetit të Republikës së Maqedonisë në pjesën që ka të bëjë me ndarjen e mjeteve për komunat të dedikuara për kryerjen e kompetencave të përcaktuara me ligj.
- realizon bashkëpunim me organizata simotra të vendeve të tjera dhe e prezanton Republikën e Maqedonisë në organizatat ndërkombëtare të pushteteve lokale;

(2) Shoqata nga paragrafi (1) i këtij neni themelohet, organizohet, funksionon dhe regjistrohet sipas kushteve dhe në mënyrë të përcaktuar me ligj.

XII. VETËQEVERISJA VENDORE

Neni 82

Themelimi i formave të vetëqeverisjes vendore

(1) Në komunë mund të themelohen forma të vetëqeverisjes vendore dhe atë:
- në qytete - bashkësi urbane;
- në vendbanimet tjera - bashkësi lokale.

(2) Territori për të cilin themelohen bashkësitë urbane janë kufijtë e njësive urbane, sipas planit urbanistik të qytetit.

(3) Territori për të cilin themelohen bashkësitë vendore janë kufijtë e komunave kadastrale të vendbanimeve.

(4) Me statutin e komunës, më së afërmi përcaktohen: format e vetëqeverisjes vendore që themelohen në territorin e komunës në përputhje me paragrafin (1) të këtij neni; raportet me organet e komunës; punët në kompetencë të prefektit kryerja e të cilave mund t'i delegohet kryetarit të këshillit të vetëqeverisjes vendore; mënyra e sigurimit të mjeteve për punët e deleguara dhe çështje të tjera të rëndësishme për vetëqeverisjen vendore.

Neni 83

Kompetencat e bashkësive urbane respektivisht vendore

Banorët, në bashkësitë urbane respektivisht vendore, në tubimet e qytetarëve:
- shqyrtojnë çështje, marrin qëndrime dhe përgatisin propozime për çështje me rëndësi të drejtpërdrejtë dhe të përditshme për jetën dhe punën e banorëve të atij territori;
- mund të zgjedhin këshill të bashkësisë urbane respektivisht vendore, në mënyrë dhe me procedurë të përcaktuar me statutin e komunës.

Neni 84

Zgjedhja e këshillit të bashkësisë urbane respektivisht vendore

Këshilli i bashkësisë urbane respektivisht vendore zgjedhet në tubimet e qytetarëve të bashkësisë urbane respektivisht vendore, në mënyrë dhe me procedurë që janë të përcaktuara me statutin e komunës.

Neni 85

Zgjedhja e kryetarit të këshillit të bashkësisë urbane respektivisht vendore

(1) Këshilli i bashkësisë urbane respektivisht vendore, nga radha e anëtarëve të vet zgjedh kryetar me mandat katër vjeçar.

(2) Për zgjedhjen dhe obligimet e kryetarit të këshillit të bashkësisë urbane respektivisht vendore në mënyrë përkatëse do të zbatohen dispozitat nga neni 47 dhe 48 të këtij ligji.

Neni 86

Delegimi i punëve të formave të vetëqeverisjes vendore

(1) Prefekti mund t'ia delegojë kryerjen e punëve të caktuara me interes të drejtpërdrejtë dhe rëndësi të përditshme për jetën dhe punën e banorëve, kryetarit të këshillit të bashkësisë urbane respektivisht vendore, në mënyrë të përcaktuar me statut.

(2) Me vendimin nga paragrafi (1) të këtij neni përcaktohen edhe mjetet për kryerjen e punëve nga paragrafi (1) i këtij neni si dhe mënyra e kryerjes së mbikëqyrjes mbi kryerjen e tyre.

XIII. MBROJTJA E VETËQEVERISJES LOKALE

Neni 87

Mbrojtja e pozitës kushtetuese të komunës

Këshilli dhe prefekti mundën të paraqesin para Gjyqit kushtetues të Republikës së Maqedonisë iniciativë për vlerësimin e kushtetutshmërisë së ligjeve dhe kushtetutshmërisë dhe ligjshmërisë së akteve të përgjithshme të ministrive dhe organeve tjera të administratës shtetërore me të cilat rregullohet pozita kushtetuese e komunës të përcaktuara me kushtetutën dhe ligjet.

Neni 88

Mbrojtja gjyqësore e komunave

Komunave u garantohet mbrojtja gjyqësore para gjyqeve kompetente lidhur me aktet dhe aktivitetet e organeve të administratës shtetërore dhe Qeverisë së Republikës së Maqedonisë me të cilat pengohet kryerja e kompetencave të përcaktuara me ligj.

XIV. GJUHËT ZYRTARE NË KOMUNË

Neni 89

Gjuha zyrtare

Në komuna, gjuha zyrtare është gjuha maqedonase dhe shkrimi i saj cirilik.

Neni 90

Gjuhët zyrtare në komunë

(1) Në komuna gjuhë zyrtare përveç maqedonishtes dhe shkrimit të sajë cirilik është edhe gjuha dhe shkrimi që e përdorin më së paku 20 % e banorëve të komunës.

(2) Për përdorimin e gjuhëve dhe shkrimeve në të cilat flasin më pak se 20 % të banorëve të komunës, vendos këshilli i komunës.

XV. DISPOZITAT KALIMTARE DHE PËRFUNDIMTARE

Neni 91

(1) Statutet ekzistuese të komunave, aktet për organizim dhe punë dhe aktet për sistematizimin e vendeve të punës në komunë do të harmonizohen me dispozitat e këtij ligji më së voni në afat prej gjashtë muaj nga dita e hyrjes së tij në fuqi.

(2) Organet ekzistuese administrative dhe drejtuese të komunave do të organizohen në administratë komunale në përputhje me këtë ligj në afat prej tre muaj nga dita e sjelljes së akteve nga paragrafi (1) i këtij neni.

Neni 92

(1) Ministri kompetent për kryerjen e punëve që i përkasin vetëqeverisjes lokale në afat prej tre muaj nga dita e hyrjes në fuqi të këtij ligji do t'i sjell dispozitat nga neni 10 paragrafi (7) i këtij ligji.

Neni 93

(1) Të punësuarit në komunë të cilët deri në ditën e hyrjes në fuqi të këtij ligji kanë lidhur marrëdhënie pune në përputhje me dispozitat e Ligjit për vetëqeverisje lokale ("Gazeta Zyrtare e R.M-së nr. 52/95) vazhdojnë të punojnë në vendet e punës në të cilat janë caktuar dhe ta pranojnë rrogën që e kanë marrë para hyrjes në fuqi të këtij ligji deri në fitimin e statusit të nëpunësit shtetëror dhe deri në fillimin e zbatimit të sistemit të rrogës, në përputhje me dispozitat nga Ligji për nëpunësit shtetëror ("Gazeta Zyrtare e RM-së nr. 59/2000; 112/2000; 34/2001).

(2) Të punësuarit nga paragrafi (1) i këtij neni janë të obliguar më së voni në afat prej dy vitesh nga dita e hyrjes në fuqi të këtij ligji të japin provim kalimtar për kontrollin e njohurive për fitimin e statusit të nëpunësit shtetëror në përputhje me dispozitat e Ligjit për nëpunës shtetëror, dhe caktohen në përputhje me aktin për sistematizim të vendeve të punës në titull që i përgjigjet titullit të fituar.

Neni 94

(1) Prefekti i komunës në afat prej tre muaj nga dita e sjelljes së ligjit, me propozim të Agjencionit, me vendim do ta përcaktojë përkatësinë e thirrjeve ekzistuese në komunë me grupet dhe tituj të përcaktuara me Ligjin për nëpunës shtetëror.

(2) Personat e punësuar në organe drejtuese dhe administrative të komunës të cilët ditën e hyrjes në fuqi të këtij ligji kanë mbi pesë vjet stazh pune caktohen në vende pune në përputhje me aktet për sistematizim të vendeve të punës në tituj pa dhënë provimin nga paragrafi 1 i këtij neni.

Neni 95

Sekretarët e këshillave të zgjedhur në përputhje me dispozitat e nenit 29 paragrafi 1 nënparagrafi 13 dhe arkitektët kryesor të qyteteve, të emëruar në përputhje me dispozitat e nenit 53 të Ligjit për vetëqeverisje lokale ("Gazeta Zyrtare e Republikës së Maqedonisë" numër 52/95), vazhdojnë t'i kryejnë punët dhe ta marrin rrogën që e kanë marrë deri në kryerjen e mandatit për të cilin janë zgjedhur respektivisht emëruar.

Neni 96

(1) Dispozitat e ligjeve ekzistuese me të cilat rregullohen çështje që në përputhje me këtë ligj janë kompetencë e komunave do të vazhdojnë të zbatohen deri në harmonizimin e tyre me dispozitat e këtij ligji, por më së voni deri në 31 dhjetor 2003.

(2) Dispozitat e neneve 17 dhe 18 të Ligjit për vetëqeverisje lokale ("Gazeta Zyrtare e Republikës së Maqedonisë" numër 52/95) do të vazhdojnë të zbatohen deri në harmonizimin e ligjeve të veçanta nga paragrafi (1) të këtij neni.

(3) Të punësuarit, pajisjet, mjetet për punë, arkivi, dokumentacioni nga njësitë rajonale e organeve të administratës shtetërore, kompetencat e të cilave në përputhje me këtë ligj bëhen komunale do të merren nga komunat në mënyrë dhe nën kushte të përcaktuara me ligjet e veçanta të harmonizuara nga paragrafi (1) të këtij neni.

Neni 97

Deri në sjelljen e Ligjit me të cilin do të rregullohen çështjet për financimin e komunave, financimi i komunave do të vazhdojë të bëhet në përputhje me dispozitat e Ligjit për vetëqeverisje lokale ("Gazeta Zyrtare e Republikës së Maqedonisë nr. 52/95) dhe Ligjin për buxhetet ("Gazeta Zyrtare e Republikës së Maqedonisë" numër 79/93, 3/94, 71/96, 46/2000 dhe 11/2001).

Neni 98

Statusi i ndërmarrjeve publike, enteve publike dhe shoqërive tregtare në pronësi të shtetit që kryejnë punë me interes publik, kompetencat e të cilave në përputhje me këtë ligj bëhen kompetencë e komunave, si edhe koha dhe mënyra e zbatimit të bilansit ndarës të kuadrit dhe të pronës, ndërmjet Republikës dhe komunave përkatëse do të përcaktohet me ligjet me të cilat do të bëhet harmonizimi nga neni 96 paragrafi (1) i këtij ligji.

Neni 99

Dispozitat e nenit 34, 50 paragrafi (1) nënparagrafët 9 dhe 52 paragrafi (2) dhe nenet 82, 83, 84 dhe 85 të këtij ligji do të hyjnë në fuqi në zgjedhjet e ardhshme lokale.

Neni 100

Deri në sjelljen e ligjit nga neni 45 i këtij ligji anëtarët e këshillit do të marrin kompensim për pjesëmarrje në seancat e këshillit pavarësisht nga kohëzgjatja e sajë më së shumti deri në 30 % nga neto rroga mesatare në Republikën e Maqedonisë, e paguar në tre muajt e fundit ndërsa kompensimet për shpenzimet e rrugës dhe të ditës do t'u paguheshin sipas dispozitave që u dedikohen nëpunësve shtetërorë.

Neni 101

Deri në sjelljen e ligjit me të cilin do të rregullohet mbikëqyrja mbi vendimet e prefektit të sjellura për punë drejtuese në kompetencë të komunave, mbikëqyrjen do ta kryej komisioni për zgjidhje në procedurë administrative të shkallës së dytë për lëmi të veçanta administrative pranë Qeverisë së Republikës së Maqedonisë.

Neni 102

(1) Deri në regjistrimin e shoqatës së komunave të Republikës së Maqedonisë, Bashkësia e njësive të vetëqeverisjes lokale të Republikës së Maqedonisë e formuar në përputhje me dispozitat e nenit 10 paragrafit 5 të Ligjit për vetëqeverisje lokale ("Gazeta Zyrtare e Republikës së Maqedonisë" numër 52/95), vazhdon t'i kryejë punët që i ka kryer deri në ditën e hyrjes së këtij ligji në fuqi.

(2) Me regjistrimin e Bashkësisë së komunave të Republikës së Maqedonisë merren pajisjet, mjetet e punës, arkivi dhe dokumentacioni i Bashkësisë së njësive të vetëqeverisjes lokale.

Neni 103

Bashkësitë ekzistuese vendore, respektivisht organet e tyre, vazhdojnë me punë me të njëjtat kompetenca deri në zgjedhjet e ardhshme.

Neni 104

Me ditën e hyrjes në fuqi të këtij ligji ndërpritet të vlejë Ligji për vetëqeverisje lokale ("Gazeta Zyrtare e Republikës së Maqedonisë" numër 52/95 dhe 60/95).

Neni 105

Ky ligj hyn në fuqi ditën e tetë nga dita e shpalljes në "Gazetën Zyrtare të Republikës së Maqedonisë".